

ფინანსური ასოციაციობანა

თამაში - ინსტრუქცია და სკრიპტი დესპანებისთვის

შესავალი

სამაგიდო თამაში „ფინანსური ასოციაციობანა“ შემუშავებულია საქართველოს ეროვნული ბანკის ინიციატივითა და საქართველოს ბანკის მხარდაჭერით, კომპანია „თამაშობანას“ მიერ.

თამაშით სწავლების მეთოდის გამოყენებით ფინანსური ტერმინების შესწავლისა და, ზოგადად ფინანსური განათლების პოპულარიზაციის ხელშეწყობისათვის, სკოლებში ხორციელდება სამაგიდო თამაშების დარიგება და დესპანების მიერ საჩვენებელი თამაშის ჩატარება გაკვეთილზე.

გაკვეთილები ტრადიციულად ტარდება კამპანიის „მოიწვიე ფინედუ კლასში“ ფარგლებში, ფულის გლობალური კვირეულისა (მარტი) და დაზოგვის მსოფლიო დღის (ოქტომბერი) პერიოდში. თამაშს წინ უძღვის პრეზენტაცია ფინანსური განათლების საკითხებზე.


მოცემულ აღწერაში ლურჯად (ჩარჩოში) მოცემულია სასაუბრო ტექსტი, რომელსაც შეგიძლიათ მიჰყვეთ ან თქვენი სიტყვებით ჩაანაცვლოთ, ხოლო შავად - ზოგადი ინსტრუქციები.

მასწავლებელთან დაკავშირება და დეტალებზე შეთანხმება

მასწავლებელთან დაკავშირებისას, დროის შეთანხმების პარალელურად სთხოვეთ:

- კლასში დაგახვედროთ სუფთა დაფა და ცარცი/მარკერი;
- დაფის წინ დადგას 1 მერხი (სადაც გაშლით თამაშს);
- დანარჩენი მერხები კი შეაერთოს ისე, რომ გამოვიდეს 4 გუნდი (იხ. სურათი).
- მოსწავლეებიც უკვე გადანაწილებულნი უნდა იყვნენ 4 გუნდად და ისხდნენ ამ მერხების ირგვლივ ისე, რომ უყურებდნენ დაფას.

თუ წინასწარ ვერ მოხერხდა მერხების დალაგება, გაკვეთილის დაწყებამდე სთხოვეთ ბავშვებს.



გაკვეთილზე წასვლამდე

გაკვეთილის მსვლელობისას, როგორც გამოცდილება გვიჩვენებს, ესწრება თითო გუნდიდან 2-3 სიტყვის ახსნა. ამიტომ სურვილის შემთხვევაში შეგიძლიათ, წინასწარ გადარჩიოთ თამაშების დასტიდან ის ბარათები და დასტის თავში დადოთ, რისი ახსნაც თქვენ ყველაზე მეტად გაგიმარტივებოდათ, ან ფიქრობთ, რომ მოსწავლეებს გაუმარტივდებათ.

გაკვეთილის ზოგადი გეგმა და ეტაპების აღწერა

გაკვეთილის ეტაპები დაახლოებით ასე გადანაწილდება:

1. თამაშის გამზადება-გაშლა - 5 წთ
2. თამაშის წესების ახსნა - 5 წთ
3. თამაში - 35 წთ
4. შეჯამება/დამშვიდობება - 5 წთ

1. თამაშის გამზადება

თამაში გაშალეთ დაფის წინ მომზადებულ მერხზე:

- ამოიღეთ დაფა და გაშალეთ;
 - გუნდების პაიკები/ფიგურები დადეთ საწყის უჯრაზე;
 - დაფაზე დაალაგეთ სათამაშო ბარათები თავ-თავის ადგილას სირთულის მიხედვით;
 - დადეთ მერხზე კამათელი და ქვიშის საათი;
 - გუნდების მაგიდაზე დააწყვეთ პატარა ჩასანიშნი ფურცლები (5-5 ცალი);
 - დარწმუნდით, რომ დაფასთან არის ცარცი/მარკერი და დაფა გასუფთავებულია.
- #### 2. თამაშის წესების ახსნა (5 წთ)

თამაშს 35 წუთში სრულად ვერ ვათამაშებთ, მიზანი არის ის, რომ ვასწავლოთ როგორ ითამაშონ და მოასწორონ თამაშის ნაწილი, შემდეგ კი ამ თამაშს ვუტოვებთ კლასს. ამასთან,

არაა აუცილებელი ყველა წესი ავხსნათ თავიდანვე, მოქმედებაშივე მარტივად გაერკვევიან. საკმარისია მხოლოდ:

- ვახსენოთ დაფა;
- ვახსენოთ პაიკები და პაიკის ფერი ავარჩევინოთ გუნდებს;
- ვახსენოთ 3 სირთულის ბარათი და რომ ეს სირთულები დაფაზე სიარულის ნაბიჯებს შეესაბამება;
- ვაჩვენოთ ქვიშის საათი;
- ვაჩვენოთ ახსნის 3 მეთოდი და მარტივად ჩვენვე გავითამაშოთ ახსნა თითოეული მეთოდით.

სასაუბრო ტექსტი:

ახლა კი დროა, თამაშით ვისწავლოთ ფინანსური ტერმინები. მზად ხართ? ეს თამაშია „ფინანსური ასოციაციობა“, შეიქმნა საქართველოს ეროვნული ბანკის ინიციატივით, კომპანია „თამაშობანასთან“ ერთად და საქართველოს ბანკის მხარდაჭერით.

ეს არის დაფა, რომელიც უნდა გავიაროთ (ამოიღეთ ყუთიდან დაფა, აჩვენეთ მოსწავლეებს და დადეთ მერხზე).

თქვენ ახლა 4 გუნდად ხართ გაყოფილი - თითოეულ გუნდს გექნებათ თითო პაიკი სათამაშო დაფაზე. ახლა ავიღებ პაიკებს და გადავინაწილოთ: რომელ გუნდს უნდა წითელი ფერის პაიკი? ყვითელი? მწვანე? შავი? (აარჩევინეთ ფერები და დარწმუნდით, რომ თითოეულ გუნდს ახსოვს თავისი ფერი. დააწყვეთ პაიკები საწყის უჯრაზე).

პაიკები ამ დაფაზე გადაადგილდებიან. იმარჯვებს ის გუნდი, ვინც პირველი მიაღწევს ფინიშს. გაკვეთილის ფარგლებში ფინიშამდე მისვლას ვერ მოვახერხებთ: ჩემი მიზანია, უბრალოდ გასწავლოთ ეს თამაში და რამდენიმე სვლა მოვასწროთ. შემდეგ ამ თამაშს თქვენ მასწავლებელთან დავტოვებ და იმედი მაქვს მომავალში ისევ ითამაშებთ და გამოიყენებთ.

როგორ ვთამაშობთ? გუნდის 1-მა მონაწილემ თავისი გუნდის დანარჩენ წევრებს უნდა აუხსნას სიტყვას, რომელიც შეხვდება აი ამ ბარათებიდან (აჩვენეთ ბარათები და დააწყვეთ დაფაზე თავ-თავის ადგილას სირთულის მიხედვით). სიტყვები ძირითადად ფინანსური თემატიკიდანაა, თუმცა შეგხვდებათ სხვა, ჩვეულებრივი სიტყვებიც.

სიტყვის ახსნა კი ხდება ამ სამიდან ერთ-ერთი გზით, რომელიც ამოვა კამათელზე:

1. თუ კამათელზე ამოვიდა ხელი და ფანქარი - დაფაზე დახატვით უნდა ახსნათ (მაგრამ თავად ეს სიტყვა არ დაწეროთ!)
2. თუ კამათელზე ამოვიდა ხელის ნიშანი - პანტომიმით, ანუ უსიტყვოდ - მოძრაობებით და მიმიკებით უნდა ახსნათ

3. თუ კამათელზე ამოვიდა საყვირის ნიშანი - 3 სიტყვით უნდა ახსნათ (აჩვენეთ კამათელი და დადეთ მერხზე)

მერხზე დგას ქვიშის საათი, ვინც ხსნით სიტყვას, შეგიძლიათ ახსნა განაგრძოთ იქამდე, სანამ ქვიშის საათი არ ჩამოიცილება. ამ დროს გუნდის ყველა წევრს შეგიძლიათ თქვათ იმდენი სიტყვა, რამდენიც მოგივთ თავში. თუ გუნდი დროის ამოწურვამდე გამოიცნობს სიტყვას, გუნდის პაიკი წინ წაიწევს. ამ დროს სხვა გუნდის წევრებმა არაფერი არ უნდა თქვათ, რომ არ დაეხმაროთ კონკურენტებს. (აჩვენეთ ქვიშის საათი და დადეთ მერხზე).

თუ გუნდი დროის ამოწურვამდე ვერ გამოიცნობს პასუხს, მაშინ სხვა გუნდებს გექნებათ საშუალება ჩემ მიერ მოცემულ პატარა ფურცლებზე დაწეროთ სიტყვის 1 ვერსია. ამიტომ თქვენი გუნდის წევრის გარდა, სხვა გუნდებსაც ყურადღებით შეხედეთ. (დაურიგეთ გუნდებს ჩასანიშნი ფურცლები).

როგორ გადაადგილდება პაიკი?

სიტყვები სირთულის მიხედვით დაყოფილია სამ კატეგორიად. შესაბამისად, რომელი ბარათიდანაც მოხდება სიტყვის გამოცნობა, გუნდის პაიკი წინ წაიწევს 3, 4, ან 5 ნაბიჯით. მე გთავაზობთ, ჯერ შედარებით მარტივი სიტყვებით, ანუ 3 ქულიანი ბარათებით დავიწყოთ.

ხოლო როდესაც სხვა გუნდი გამოიცნობს სხვა გუნდის სიტყვას, მაშინ მისი გუნდის პაიკი 1 ნაბიჯით გადაიწევს წინ.

ვიწყებთ თამაშს!

3. თამაში (35 წთ)

გამოიყვანეთ 1 მოხალისე პირველი გუნდიდან, სთხოვეთ ჯერ გააგოროს კამათელი და ნახეთ, ახსნის რომელი მეთოდი მოუწევს. ამის შემდეგ აირჩიოს სირთულე და აიღოს 1 ბარათი. ბარათზე 3 სიტყვაა მოცემული, მან კი ის სიტყვა უნდა ახსნას, რომელიც კამათელზე ამოსული მეთოდის გასწვრივია. მოსაფიქრებლად მიეცით 10 წამი.

თუ მოსწავლე ფიქრობს, რომ სიტყვა არ იცის, ვეუბნებით, რომ ყველა წევრს შეუძლია 1 ბარათის გამოცვლა, ან მეორე ვერსია - თქვენ უხსნით ამ სიტყვის მნიშვნელობას ჩუმად. როდესაც გეტყვით, რომ მზად არის, ატრიალებთ ქვიშის საათს და იწყებს ახსნას.

თუ გუნდმა გამოიცნო სიტყვა, მოთამაშე ბარათის ქულის შესაბამისი რაოდენობის უჯრით წინ გადაწევს თავის პაიკს. თუ გუნდი დროის ამოწურვამდე ვერ გამოიცნობს სიტყვას, დანარჩენ 3 გუნდს სთხოვეთ თავიანთი ვერსია პატარა ფურცლებზე დაწერონ.

თუ სიტყვა ვერავინ გამოიცნო, ან ერთმა გუნდმა გამოიცნო და დანარჩენებმა არ იცნა სიტყვის მნიშვნელობა, თქვენ აუხსენით ეს ტერმინი მოსწავლეებს.

ფინანსური ტერმინების მნიშვნელობა ასევე შეიძლება ნახონ ტერმინების ლექსიკონში, რომელიც თამაშს ახლავს და ასევე დაასკანერონ ფინედუს ლექსიკონის QR კოდი თამაშის ყუთიდან.

მოკლედ რომ შევაჯამოთ, სტრუქტურა ასეთია, ახსნა -> გამოცნობა ბავშვების მიერ -> დესპანის მიერ სიტყვის გამეორება/მოკლე ახსნა.

თამაშობთ იმდენ ხანს, სანამ გაკვეთილის ამოწურვამდე არ დარჩება 5 წუთი.

4. შეჯამება/დამშვიდობება (5წთ)

სასაუბრო ტექსტი:

ყოჩად! ყველა გუნდი ძალიან კარგი იყო! მოგეწონათ დღევანდელი გაკვეთილი და თამაში? რა მოგეწონათ ყველაზე მეტად? რა დაგამახსოვრდათ ყველაზე მეტად?

შეგახსენებთ, რომ ეს სამაგიდო თამაში თქვენს კლასში დარჩება და იმედია, მოგვიანებით ერთად განაგრძობთ თამაშს და ყველა ტერმინს გაეცნობით.

მეგობრებო, როდესაც თქვენი ასაკიდანვე გაქვთ ცოდნა ფინანსურ საკითხებზე, უფრო ადვილია ფინანსური დამოუკიდებლობის მოპოვება და ცხოვრებაში საუკეთესო არჩევანის გაკეთება.

დაგემშვიდობებით, მადლობა მოწვევისთვის!